

आकाशवाणी जयपुर-अजमेर
प्रादेशिक समाचार।
दिनांक 26.04.2024 समय: 18.45 बजे

- लोकसभा चुनाव रा दूजा दौर रा तैत आज प्रदेश री 13 संसदीय सीटां माथे वोट पड्या-वोट देवण वाळा उमाव सागे लोकतंत्र रो उत्सव मनायो।
- निर्वाचन विभाग री पहल अर नवाचारां रो असर निजर आयो- पहला दौर री तुलना मांय वोटिंग प्रतिशत मांय इजाफो व्हयो।
- दूजा दौर मांय 152 उम्मीदवारां रा चुनावी भाग रो फैसलो ईवीएम मांय कैद-4 जून ने नतीजा सामी आवेला।
- मौसम मांय बदलाव ऊं प्रदेश रा केई हलकां मांय आंधी अर बारिश-रावतभाटा मांय बीजळी पड जावण ऊं तीन जणा री मौत।

000

लोकसभा चुनाव रा दूजा दौर रा तैत राज्य रा 13 संसदीय हलकां मांय आज शांति सागे वोट पड्या। सिंज्यां पांच बज्यां ताई 59 दशमलव 19 फीसदी वोट पड ग्या हा। सब ऊं बत्ता 69 दशमलव 79 फीसदी वोट बाडमेर संसदीय हलका मांय जद के सब ऊं कम 51 दशमलव 75 फीसदी वोट पाली सीट माथे पड्या हा। बांसवाड़ा मांय 68 दशमलव 71, कोटा मांय 65 दशमलव 38, झालावाड-बारा मांय 65 दशमलव 23, चित्तौडगढ मांय 61 दशमलव 81, उदयपुर मांय 59 दशमलव 54, जोधपुर मांय 58 दशमलव 35, जालौर मांय 57 दशमलव 75, भीलवाड़ा मांय 54 दशमलव 67, अजमेर मांय 52 दशमलव 38 अर राजसमंद मांय 52 दशमलव 17 अर टोंक-सवाईमाधोपुर मांय 51 दशमलव 92 फीसदी वोट पड ग्या हा। संवारे 7 बज्यां सुरू व्हयो वोट देवण रो काम सिंज्यां 6 बज्यां ताई चाल्यो। 6:00 बज्यां ताई मतदान केन्द्र रा परिसर मांय पूगण वालां मतदातावां ने 06:00 बज्यां पाछे ई वोट देवण रो मौको दियो ज्यो। कुछ मतदान केन्द्रां माथे हाल ई वोट देवण रो काम चालण रे कारण मतदान प्रतिशत मांय बधोतरी री संभावना है।

सरकार चुणबा री जिम्मेदारी समझता थकां केई ठौड़ां नुवा परण्या जोड़ा वोट दे र जिम्मेदारी निभाई। जालौर रा मेडा पुरोहितान मांय नुवा परण्या बींद-बींदणी पैली वोट दे र पछे घर मांय दाखिल व्ह्या। चित्तौडगढ रा कपासन मांय नुवो परण्यो जोडो पिरवार वाळां सागे वोट दीनो। बांसवाड़ा रा चौरासी हलका मांय एक बींद बारातियां सागे घोड़ी चढ र वोट देवण ने पूग्यो। पाली रा डिगाई मांय एक जोडो फेरा लेतां ई वोट देवण ने पूग्यो। चित्तौडगढ रा बेगूं मांय एक बींद बारात ले जावण ऊं पैली वोट दीनो। भीलवाड़ा लोकसभा हलका रा मांडलगढ मांय जोजवा रा मतदान केन्द्र माथे ढोल बजा र लोगां ऊं वोट देवण री अपील करी ज्यी। बूंदी अर झालावाड़ मांय हल्की बारिश बीचे मतदान केन्द्रां माथे वोट देवण वाळां री लेणां निजर आयी।

कोटा अर आरे-सारे रा हलकां मांय ई आंधी-बारिश बीचे लोग वोट देवण सारू पूग्या। कोटा रा एक मतदान केन्द्र माथे एक जोडो नुवा जन्म्या टाबर ने ले र वोट देवण ने पूग्यो। डूंगरपुर, बांसवाडा अर आरे-सारे रा आदिवासी हलकां मांय ई लारला कुछ दिनां मांय परण्या जोड़ां ई उमाव सागे वोट देवण ने आया। अजमेर रा नसीराबाद मांय ट्रांसजेंडर मतदाता मुस्कान वोट दे र घणी राजी निजर आयी। सांचौर मांय साधू-संत ई उमाव सागे वोट देवण ने पूग्या। करावडी बूथ माथे एक बुजुर्ग संत शिष्यां सागे वोट देवण सारू आया। सरहदी हलका बाडमेर री दूर-दराज री ढाणियां मांय लोग ऊंट गाडियां मांय बैठ र वोट देवण सारू पूग्या। सिरोही जिला रा

माउंट आबू मांय प्रदेश रा सब ऊं ऊंचा मतदान केन्द्र शेरगांव मांय ई मतदाता उमाव सागे वोट देवण सारू पूग्या।

.....

टोंक-सवाईमाधोपुर संसदीय हलका मांय ई केई ठौड़ां महिलावां नाचती-गाती मतदान केन्द्रां माथे पूगी। जालौर अर सिरौही मांय केई ठौड़ां प्रवासी राजस्थानी वोट देवण सारू पूरा पिरवार सागे पूग्या। जोधपुर मांय एक मतदाता इंग्लैण्ड ऊं वोट देवण ने आयो।

बाड़मेर रा नरसाली नाड़ी गांव मांय 113 साल री रूपो देवी मतदान केन्द्र ताई पैदल जा र वोट दीनो। बूंदी रा बूथ नं. 58 माथे 102 साल रा भंवर लाल शर्मा व्हील चेयर माथे बैठ र वोट दीनो। घर ऊं वोट देवण रा सुबीता रे बावजूद केई दिव्यांग मतदाता मतदान केन्द्र माथे जा र वोट दीना। कोटा रा पोलाईकलां, डूंगरपुर रा दाद सलाखड़ी अर सलूमबर मांय गामड़ी रा मतदान केन्द्रां माथे लोग नाव रे जरिये वोट देवण ने पूग्या। जयसमंद झील रा टापुआं बीचे बस्या लोग ई नाव मांय बैठ र वोट देवण सारू पूग्या। बारां जिला रा किशनगंज मांय सहरिया स्वांग नृत्य माथे सगळां री निजर रही। सिरौही अर बांसवाडा मांय महिलावां आदिवासी गहणा अर पहराव मांय वोट देवण सारू पूगी। शाहपुरा समेत न्यारा-न्यारा हलकां मांय बणायी ज्या ईको फ्रेंडली मतदान केन्द्रां माथे सोहणी सजावट करी ज्यी। सवाईमाधोपुर से हमारे संवाददाता ने बताया कि वहां भी मतदाताओं में वोट डालने को लेकर उत्साह दिखाई दिया।

.....

इण ऊं पैली संवारे 07:00 बज्यां वोट देवण रो काम सुरू व्हेता ही मतदाता पूरा उमाव सागे वोट देवण सारू पूगण लाग्या। लोकतंत्र रा पर्व मांय भागीदारी करण सारू वोट देवण वाळां मांय उमाव निजर आयो। नौजवानां सागे बुजुर्ग अर महिलावां ई पूरा उमाव सागे वोट देवण रो हक इस्तेमाल कीनो। पहली दफा वोट देवण रा पात्र बण्या मतदाता ई जोश सागे वोट देवण सारू मतदान केन्द्रां माथे पूग्या। झालावाड़ मांय पैली दफा वोट देवण री पात्र बणी अदिती वोट दियां पाछे घणी राजी निजर आयी।

.....

संवारे रा हेप्पी ऑवर्स मांय केई ठौड़ां वोट देवण वाळां ऊं पौधा रोपायी ज्या। मतदान केन्द्रां माथे खुद री फोटो खींचण री ठौड़-सेल्फी बूथ माथे फोटो खिंचावण सारू ई वोट देवण वाळां मांय उमाव निजर आयो।

लोकसभा चुणाव रा दूजा दौर रा तैत प्रदेश री 13 लोकसभा सीटां सागे आज बागीदौरा विधानसभा सीट माथे ई उपचुनाव सारू आज वोट पड्या। आ सीट कांग्रेस रा महेन्द्र जीत सिंह मालवीय रे विधानसभा री सदस्यता ऊं इस्तीफो देवण रे कारण रीती व्हे गयी ही। म्हाणा खबरनवीस बतायो के मालवीय बांसवाड़ा लोकसभा सीट ऊं भाजपा रा उम्मीदवार रा तौर ऊं चुनाव लड रह्या है।

.....

000

राज्य री ज्यां 13 लोकसभा सीटां माथे आज वोट पड्या, वठे वोट देवण वाळा केई मान्योड़ा उम्मीदवारां रा सियासी भाग रो फ़ैसलो ईवीएम मांय बंद कर दीनो। पेश है म्हाणा खबरनवीस री रपट-

.....

जालौर लोकसभा हलका मांय लोग पूरा उमाव सागे वोट देवण ने मतदान केन्द्रां माथे पूग्या।

जोधपुर लोकसभा हलका मांय ई लोग पूरा उमाव सागे वोट देवण ने पूग्या। वठे वोट देवण सारू आया पैली दफा वोट देवण रा पात्र मतदातावां ने सर्टिफिकेट दे र नवाजी ज्या। ई बीचे ईवीएम अर वीवीपेट ने करड़ी हिफाजत बीचे तैय केन्द्रां माथे पूगाई जा रही है। अ ईवीएम 4 जून ने

वोटां री गिणती रे दिन खुलेला ज्यीं दिन 18वीं लोकसभा सारू चुण्या जावण वाळा उम्मीदवारां री ठा पड़ेला।

000

चित्तौडगढ ज़िला रा रावतभाटा मांय आज बीजळी पड़ जावण ऊं खेत मांय काम कर रहया तीन जणां री मौत व्हे गयी अर चार जणा झुलस गया ज्यां ने ईलाज सारू डाबी रा अस्पताल मांय भर्ती करायी ज्या है। पुलिस रे मुजब हादसा रा शिकार लोग भुंजरकलां गांव रा रहवासी हा। एक और हादसा मांय पाली जिला रा चामुंडेरी गांव रा तळाव माथे मछलियां पकडबा सारू गया एक ही पिरवार रा चार जणा री डूब जावण ऊं मौत व्हे गयी। पुलिस रे मुजब घटना काल सिंज्यां री है पण इण री आज ठा पड़ी। पुलिस गोताखोरां री मदद ऊं लाशां निकाळ र मरण वाळां रा पिरवार वाळां ने सूपी।

000

प्रदेश मांय आज केई ठौड़ां आंधी अर बारिश ऊं मौसम मांय बदलाव निजर आयो। राज्य रा दक्षिणी जिलां मांय केई ठौड़ां धूलभरी आंधी चाली अर बादळां री गाज सागे बिरखा व्ही। बूंदी, कोटा, झालावाड अर बारां समेत आरे-सारे रा हलकां मांय बिरखा व्ही। मौसम विभाग रे मुजब राज्य रा ऊगणी राजस्थान मांय ई कठे-कठे हल्की बारिश व्ही। विभाग अलवर, बारां, भीलवाडा, बूंदी, कोटा, सवाईमाधोपुर, भरतपुर अर आरे-सारे रा हलकां सारू यलो अलर्ट जारी कीनो है। जयपुर, टोंक, दौसा अर अजमेर जिलां सारू ऑरेन्ज अलर्ट जारी करी ज्यो है। आं जिलां मांय तेज हवा चालण अर बादळां री गाज सागे ओला पडबा रा आसार है। दूजी कानी राज्य रा आतूणी हलकां मांय आज आखा दिन तेज गर्मी रही।